

և 200 պալատականաց, այլ փութամ զի դործն ձեր կատարեսցի, և օրն տարածամեալ մեկնեցան վարդապետքն:

Եւ ՚ի վաղիւն չոքան առ Ոստիկանն Մէհէմէտ Պէյ և պատմեցին նմա զամենայն եղեալն, և նորա յուսադրեալ զնոսա խոստացաւ խօսիլ ընդ Բդեշխին և ընդ երկրորդին, որ և արար իսկ չհայեցեալ ՚ի խօթութիւն իւր: Իսկ Քեահեայն վերստին ՚կոչեալ առ ինքն զՎարդապետն ասէ՝ վասն Ծննդեան և Աստուածածնի 1500 քսակս խնդրէ ՚ի ձէնջ Բդեշխն, ապա թէ ոչ՝ միայն վասն Ս. Յարութեան 100 քսակ. ետուն պատասխանի՝ ծերունիքն զայդ ոչ հըրամայեցին մեզ, ասէ՝ ընդէ՞ր եկիք. ասեն՝ Կուսակալն և դուք գրով խնդրեալ էիք և Ծերակոյտն զմեզ առաքեաց, զի ոչ երբէք յուսային թէ առանց քննութեան և իրաւանց առնէք զայդ: Ասէ՝ մի լիցի ձեզ ՚ի մէջ բերել զԾնունդ և զԱստուածածին, մոռացէք զայնս, և վասն այլոց հոգացէք զԲդեշխն. նոքա ասեն՝ զի՞նչ արարիք զի հոգասցուք, միթէ Յոյնք հանեալ էին զմեզ ՚ի վանաց մերոց՝ և վերքստին մուծէք զմեզ անդր, և կամ շինեցա՞ք ինչ ՚ի տաճարին Ս. Յարութեան, այլ միայն ՚ի բաժին տեղիս մեր ըստ բնականին կախեցաք պատկերս և կանթեղս և այլքն մնացեալ են. Քեահեայն ասէ՝ այդ օրիկ բանք ձեր չեն ինչ, զի զոր ինչ արարիք յաւուրս Պօճաքեանին, կարող եմք աւերել զամենայն, և առնուլ ՚ի ձէնջ զոր կամիմքս և տալ պատասխանի Տէրութեան (դիտումն Քեահեայնի էր տալ քանդել զԻւղարերից սեղանն և նշաւակել զազգն). զի հակառակորդք ձեր առ այս ջանան միշտ և աղաչեն և խոստանան բազում ինչ: Ասացին՝ մեք ընդ հրամանաւ և հպատակ Տէրութեան եմք, արարէք որպէս վայելէ մեծութեան ձերում: Եւ նորա բարկացեալ ասէ՝ կատարեմք, զոր ասեմքս՝ առնումք՝ զոր պահանջեմքս, դուք ընդէ՞ր եկիք այսր, միթէ ՚ի խնճոյս հրաւիրեցայք, և բարկութեամբ ելեալ զնոց անտի:

Իսկ Հրեայ Սողոմօնն սկսաւ մխիթարել եւ յորդորել զնոսա. չկամիմ ասէ թափիլ ձեզ ՚ի դրամոց, և ոչ վշտանալ Պատրիարքին եւ Ծերունեաց, սակայն սոքա բռնութեամբ առնուն ՚ի ձէնջ զգրամն, և յառակ նշաւակի կացուցեալ զձեզ, աւերեն զոր ինչ արարիք ՚ի Ս. Յարու-